

# avaloracion diagnostica educacion primària

## competència comunicativa: aranés

### tèxte de comprenença orau

#### instruccions entar ensenhaire

Cau repartir eth quadèrn dera pròva e assegurar-se de que toti es escolans liegen es qüestion abans d'escotar eth tèxte.

Eth docent a de liéger eth tèxte dus viatges, es escolans **non** lo veirà escrit. Eth primèr viatge ei entà que responen as qüestions e era segona ei entà que revisen es responses.

Era lectura a d'èster lenta e expressiva, en tot marcar es pauses. Era prononciacion a d'èster clara e eth ton de votz adequat entà afavorir ua bona comprenença.





# Eth Parc Nacionau d'Aigüestòrtes

Eth passat mes d'octobre, siguec er aniversari deth Parc Nacionau d'Aigüestòrtes. Hec 60 ans. Entà celebrà'c, es escolans de quatau heren ua visita ath parc.

Siguec eth 15 d'octobre. Anèren enquia Espot damb autocar e aqui se dividiren en grops de quate entà pujar en lac de Sant Maurici en 4x4. Quan arribèren en lac les demorauen uns monitors, 'Es amics deth Parc'. Alavetz, heren un petit itinerari caminant pes entorns.

En aquest camin apreneren a describir es peades des bèsties que i viuen: isards, cabiròus, lèbes... Vederen qué mingen e a on hèn es sues tutes. Encara qu'an pòur e s'amaguen des persones, ne vederen quauques ues.

Despús dinèren ath cant deth lac. Ena tarde heren un jòc de camp, ua gimcana per grops, organizada pes monitors. Eth grop que sabie mès causes sus eth Parc ère qui guanhaue. Auien de conéisher es arbes, es plantes, es montanhes... Atau qu'estudièren es sues caracteristiques e arribèren a èster autentic coneishedors e amics deth Parc!

Es monitors les expliquèren que, s'auien sòrt, dilhèu podien veir er esperit deth lac... Son ben pògues es persones que l'an vist! Quauques ues l'an escotat. Es mès vielhs d'aquera contrada expliquen que l'an entenut a cantar ua cançon. Mès, peth moment, toti es que l'an escotada an demorat tan impressionats que non an estat capaci de rebrembar-la. D'auti asseguren auer vist er esperit. E n'i a que diden qu'ei ua hada que viu ena prigondor des aigües deth lac.

Sabetz qué s'a de hèr entà entèner o veir er esperit deth lac? Donques ei ben senzilh! Hèr bondat, èster respectuosi damb era natura e damb es companhs, e estimar molt eth Parc.

Entà auer un rebrembe deth Parc, durant ua estona es mainatges e mainades de quatau diboishèren es montanhes, eth lac, es plantes e es arbes que mès les agradèren. E tanben pintèren quauques bestiòtes qu'auien vist.

Tath torn des quate dera tarde ac remassèren tot. Sagèren de non deishar papèrs ne lordèra, perque entre toti s'a d'arribar a poder gaudir deth Parc e que pogue hèr un arramat d'ans mès.

E a vosati, vos agradarie visitar eth Parc Nacionau d'Aigüestòrtes?